

Supervizor za Brčko: Distrikt Brčko ne pristaje da ga ucjenjuju električnom energijom



“Distriktu Brčko sada je dostupno zakonito i količinski odgovarajuće snabdjevanje električnom energijom,” rekao je danas supervizor Distrikta Brčko Dr. Raffi Gregorian, odgovarajući na komentare koje je gradonačelnik Brčkog Dragan Pajić dao za *Blic*. “Veoma sam razočaran činjenicom da je gradonačelnik dao tako neiskrene i krajnje neodgovorne izjave, posebno tokom praznika. Od njega se tome nisam nadao.”

“U Distriktu Brčko poštujemo zakon, i bilo kakav aranžman za snabdjevanje električnom energijom koje nije u okviru zakona ne može se sudski izvršiti. Stabilno snabdjevanje električnom energijom mora se zasnivati na nečemu većem od običnog hira jednog političara, što je bio slučaj posljednjih nekoliko godina i što stranka kojoj gradonačelnik pripada, SNSD, očigledno želi nastaviti. Neću dopustiti da se Distrikt Brčko ucjenjuje na tako nedostojan način,” rekao je supervizor Gregorian.

Osamnaestog septembra 2009. godine visoki predstavnik je donio niz odluka kojima je obezbijeđena osnova za zakonito i provedivo snabdjevanje Brčkog električnom energijom od strane dobavljača iz oba entiteta. To je uradio nakon što entiteti nisu odgovorili na nekoliko upozorenja Upravnog odbora Vijeća za implementaciju mira, visokog predstavnika i supervizora. Te odluke, zajedno sa drugima čija je svrha da se građanima Brčkog omogući promjena entitetskog državljanstva, zakonske su

obaveze entiteta—u nekim slučajevima starije od 10 godina—koje proističu iz odluka Arbitražnog vijeća za Brčko, koje je utemeljno u skladu sa Aneksom 2 Daytonskog mirovnog sporazuma. Protivno Konačnoj arbitražnoj odluci za Brčko, Aneksima 2, 4, i 10 Daytonu, kao i rezolucijama Vijeća sigurnosti Ujedinjenih nacija prema Poglavlju VII Povelje UN-a, koje su starije od 10 godina, organi vlasti Republike Srpske odbili su objaviti ove odluke i sada pokušavaju iskoristiti snabdjevanje električnom energijom da bi ucijenili Distrikt i supervizora.

Kao što je slučaj i u vezi sa svim drugim, supervizor Gregorian insistira da zvaničnici Brčkog poštuju vladavinu zakona. "Organi vlasti Brčkog trenutno rade na zaključivanju ugovora za pouzdano i sasvim zakonito snabdjevanje električnom energijom za 2010. godinu," rekao je. Moglo bi doći do određenog porasta cijena ukoliko cijene porastu i u ostatku zemlje, ali to djelomično ovisi i o tome da li će Državna regulatorna komisija za električnu energiju (DERK) obaviti svoj zadatak i utvrditi tarife. Sve do sada, predsjedavajući DERK-a, imenovan ispred RS, nezakonito je sprečavao DERK da provede zakon u vezi sa ovim, uprkos tome što je obaviješten o ozbiljnim posljedicama i ličnoj odgovornosti za takvo protivzakonito i protivustavno djelovanje. "Nijedan entitet ne može imati nikakvu vlast u Distriktu Brčko, koji je pod direktnim suverenitetom države, i zato samo DERK može vršiti funkciju regulatora za Brčko," rekao je supervizor Gregorian.